

甘水仙源錄卷之三

清和妙道廣化真人尹宗師碑銘并序

汝 陽 弋 穀 撰

宗師全真嗣教六世祖也自守真緒風化鼎盛什百於疇昔形器之域古今同盡春秋八十有三遽有拂衣啟手之嘆以辛亥二月六日昇於大房山清和宮之正寢甯神五華山者幾十稔矣嗣教誠明張公一日語眾曰清和師恩報祖師之恩遂大葬之禮仍卽其福地並建宮宇勝槩甲天下弘闡祖道功越古今吾儕享其成業今無一報顏實腆矣將刻碑紀實以詔無窮若何僉曰唯遂以中統三年十月吉日徵文於汝陽弋穀僕以師

道藏輯要

甘水仙源錄

聖

翼集二  
×××

真道德高厚奧妙無方詎以荒疎淺淺者所能窺測形容哉固辭不可謹按門人馬志通所紀行狀仍摭其功德之著見於耳目者序述之夫道之在天下一而已惟天之所以畀付於聖賢者無不備其所以濟斯世而見於功用者或久近廣狹之不齊何哉曰時也時非聖賢所能必能不滯其時而已或拱揖廊廟或私淑側陋或清靜而化揖讓而治或平水土降播種或放伐以救焚溺或寬默以革苛僞文勝質喪則示還淳反樸之訓禮壞樂崩則正三綱五常之教大則天下後世小則一郡一邑隨機應變與物推移要不過乎徇道以濟斯世耳由跡以觀之功用之不齊者所遇之時異也則天之以是道而畀付於聖賢者

屬書有二哉道猶水也渴則爲酌飲旱則爲灌溉道猶火也飢則爲烹飪寒則爲煦嫗用雖不同而水火曷嘗有二哉頃以金錄訖運喪亂並興黔黎殄於菹醢玉石燼於烈火天意開顧挺生至人全昇斯道以假援之之手於是重陽而後丹陽長真長生長春繼出而全真之教興及清和接長春之統授受之際累聖之妙無餘蘊父作子述闡化數十年徒侶徧天下聞望重朝野風之所靡狼戾易心強梗順命革煩苛爲清靜化湯火爲衽席挈一世鄙天之民躋之仁壽之域自古教法之盛功德之隆惟清和師爲最蓋天之昇付之道一而所遇之時異也師諱去平字大和姓尹氏遠祖居滄州前宋時有官萊州者因家焉顯

道藏輯要

甘水仙源錄

四

真集二  
八文八

高祖妣有子九人俱登進士第仕至郡守者七人顯大父公直顯考弘誼皆隱德不耀師於大定九年正月二十日生是夕其母方寐見儀衛異常皆盛服而入神思愕然驚悟師已誕矣時里人相驚曰尹氏宅火奔救之至則無火稍長舉止異凡兒三歲穎悟善記事五歲入學日誦千餘言讀書卽立解常因祀事究生死理杳然遐想自忘七歲遇陝西王大師有從遊意十四歲遇丹陽真人遽欲棄家入道其父難之潛往十九歲復迫令還家錮之竟逃出再三始從之住昌邑縣之西庵常獨坐樹下達旦或一夕見長生劉真人飄然而來斷其首剖其心復置之覺而大有所悟後住庵福山縣養疾患困勤瘁者累年眾德之

遊濰州時龍虎完顏氏素豪倨慕師道德施園地創觀曰玉清  
率家人尊事之今觀廢於兵而松檜鬱爲茂林後覲長春真人  
於棲霞觀執弟子禮真人特器異之付授無所隱又受易於太  
古郝真人受口訣於玉陽王真人自是道業日隆聲價大振四  
方學者翕然宗之己卯歲

太祖皇帝遣便宜劉仲祿徵長春真人仲祿及益都真常李公  
曰長春今在海上非先見尹公必不能成此盛事及濰陽謁師  
於玉清之丈室見其神采嚴重不覺畏敬自失從容語及詔旨  
師大喜曰將以斯道覺斯民今其時矣遂諧往覲長春真人於  
萊州昊天觀先是金宋聘命交至皆不應至是師勸行決計北

道藏輯要

甘水仙源錄

聖

真集二

卷上

上時從者十八人皆德望素重者師爲之冠辛巳及癸未備嘗  
艱阻旣見帝於西印度奏對稱旨還及雲中真人聞山東亂國  
兵又南下曰彼方生靈命懸砧鼎非汝莫能救遂遣往招慰聞  
耆樂附所全活甚多乙酉歲勅令長春真人住太極宮卽今長  
春宮也師在席下四方尊禮者雲合師曰我無功德敢與享此  
供奉乎遂辭退住德興之龍陽觀屢承真人手劄示以託重意  
及真人升師方隱烟霞觀又欲絕跡連遁爲眾以主教事敦請  
勉從之還長春宮以嗣事自任自是徒眾輻湊翬鱗樂貢者日  
充塞庭宇忽謂眾曰吾素厭冗劇喜山林遂因平樂請主醮事  
而出遁景州之東山未幾燕之僚士固請還宮壬辰帝南征還

師迎見於順天慰問甚厚仍令皇后代祀香於長春宮既資優  
渥甲午春遊母閭山太玄觀之李虛玄語人曰去年院中青氣  
氤氳者累日占者以爲當有異人至今師來旣驗矣踰春南歸  
及玉田眾喜爲數日留日已晡遽促駕兼夜行五十餘里舍豐  
草中眾莫知所以後還宮始知在玉田時有寇數百欲劫掠追  
至大合甸不及而反從者相賀曰非師奈我輩何時皇后遣使  
勞問賜道經一藏乙未春詣沁州主黃籙醮事入郊城境居人  
或夢縣之地祇曰真人來當警衛無虞及平遙理醮事時旱久  
且風醮之三晝夜燈燭恬然在他境猶風沁帥杜德康平遙帥  
梁瑜各施宮觀一方傾心焉九月達平陽分命披雲宋公率眾

道藏輯要

甘水仙源錄

巽

翼集二  
×文八

鏤道藏經板不數載而完所費不貲而人樂成之亦師爲之張  
本師以此道化大行歸功祖師重陽真人遂留意祖庭時京兆  
行省田公馳疏來請適與師意合丙申春始達於榛莽中規度  
兆域及宮觀基址終南太華等處諸觀宇廢不能復咸請主於  
師時陝右甫定遺民猶有保柵未下者聞師至相先歸附師爲  
撫慰皆安堵如故繼而被命於雲中令師選天下戒行精嚴之  
士爲國祈福化人作善時平遙之興國觀崢之神清前高之玉  
虛白雲洞定襄之重陽沁之神霄平遙之玄都皆主於師秋帝  
命中書楊公召還燕道經太行山間羣盜羅拜受教悉爲良民  
出井陘歷趙魏齊魯請命者皆謝遣原野道路設香花望塵迎

拜者口千萬計貢物山積略不顧戊戌春忽曰吾老矣久厭勞事以正月上日傳衣鉢於真常李公俾主教事乃卜築五華山并增葺大房山之直陽觀更曰清和宮以爲菟裘焉終南祖庭葬具已備庚子冬請師董其成欣然而往雖冒寒跋險不憚也常曰吾以報師恩耳時季冬京兆一境旱眾禱曰師來和氣必應下車而雪大歲葬禮以明年正月二十五日既事時陝右雖甫定猶爲邊鄙重地經理及會葬者四方道俗雲集常數萬人物議惻惻不安賴師道德素重鎮伏邪炁故得完其功初重陽真人修道於此既成火其庵而東貽詩有後人復修意至是師賡之亦有繼祖來修之語噫百年事終始脗合豈偶然哉於是

道藏輯要

甘水仙源錄

畢

真集二

XXXX

剪蕪平邱土木並作堂廡殿閣粲然一新既成額以重陽以示報本意若華山之雲臺驪山之華清太平宗聖等宮悉擇名重耆宿以主之興完皆踰舊是年還燕夏五月過太原時自春不雨禾種不入師憐之出已帑物爲香火費爲民祈禱雨大霑及還燕無幾何謂侍者曰我常便清和宮之西堂故居之今爲我灑掃方丈從之翌日長往及宮泐頌禮聖畢訣眾曰吾將逝矣眾驚愕師曰吾意已決夫復何言有進紙筆者默不應惟戒葬事勿豐遂不食但飲水啜茶危坐談道語音雄暢異常是夜久正衣冠曲肱而逝眾毀哭過哀時馨香之氣滿室遠近聞者奔走賻贈哀戚若喪考妣初師遺言葬大房至是僚士固請遂葬

五華御輿意也中統改元二年詔贈清和妙道廣化真人師平  
日著述甚多門人板之目曰葆光集并語錄皆通貫經義洞見  
道體所謂博學而約說者當時朝旨褒崇及宏儒名卿詩文讚  
美哀爲一集目曰應緣錄其覺後進則高下不遺蹊逕坦明以  
謙遜勤約爲治心之要以踐履功行爲入道之基及其縱說則  
時亦露機緘之妙所謂窮理盡性以至命者也得其門者由堂  
及奧其次不失爲誠謹之士其成就於人者如此初居濰陽龍  
虎家逾二十年姬侍日滿前終莫一識其面嘗失善馬獲其盜  
物色旣驗盜畏罪不承曰此我馬也師卽還馬縱去其高潔不  
累於物如此至大至剛之氣充諸內形諸外望之如神卽之如

道藏輯要

甘水仙源錄

異

翼集二  
X 28

春不怒而威匪爵而尊雖萬乘不足加其重雖窮處不足爲之  
輕其平日之所養者如此及遭時得君權道濟物祥風時雨覆  
及遠方跂行喙息罔不得其所其見於功用者如此其至誠前  
知感通神明則又時出人意外以天挺之姿承積累之基譬猶  
日中之陽月盈之光不期盛而自盛尙且謙抑自居淡泊自樂  
化應乎無窮之緣神寂乎寥廓之鄉體用兼備無過不及之弊  
其諸異乎同源而異流者歟抑世有以綱常爲言者是又大不  
然自四海橫潰華禮蕩滅汚俗所染又豈特於借鋤德色取筭  
諛語八佾舞庭召王所狩者乎及風化所過暴者仁奪者讓泰  
者抑上下恬然此於綱常之助其功豈易量哉僕悼夫昧大體

而妄自分裂者故并及之銘曰

叔世運厄坤軸旋皇綱解紐兵方連鼎中生靈若小鮮磨牙萬  
喙垂飢涎天生至人蓋汝憐神道設教畀已專重陽發源亦有  
傳得自無始先天先世間果有甘河泉萬劫老派常涓涓流入  
濰陽玉清前灌溉六葉開金蓮混沌雖鑿大道全積霽掃盡孤  
月圓至理渾融無正偏漆園鄭圃非獨賢遭時得君明機權鑑  
光亦豈從媼妍冥鴻高舉蓬海邊聞闔萬里來翩翩鰲頭可釣  
虎可編萬蚪誰信容筭鞭頽波力障迴九川塗炭氣化成几筵  
惠雨一灑劫火燃大地墾作種玉田精衛投石海空填螟蛉遇  
祝速變遷風雲千載非偶然轉禍爲福皆夤緣歸來演教談妙  
道藏輯要

甘水仙源錄

巽

翼集二

玄英華咀嚼九九篇琅函萬軸成蹄筌始信天上無癡仙洙泗  
豈特徒三千燈分大小俱輝輝有心不敢自聖癡有口難說無  
礙禪人云功行徧八埏波浪幻跡從涸涸草履黃裘茅一椽茹  
芝大房腹便便直鉤坐釣三峯巔寶地花木肥芊芊青山不礙  
行雲煙死而不亡壽更延他山有琰寶可鑄光騰億劫無歲年  
千谿萬壑分嬋娟明月依舊懸青天

玄門掌教大宗師真常真人道行碑銘

翰林學士承旨資善大夫知制誥兼修國史王鶚撰

道教之曰全真以重陽真人爲祖師其自甘河仙遇劉蔣焚庵  
行化關東前後僅十年而天下翕然宗之非信道篤而自知名

安能特立章章如是卒之搜奇訪逸得高弟四人曰丹陽曰長  
真曰長生曰長春四人者俱能整立綱弘聖教使運數起而道  
德新甦矣哉至於禮聘兩國聲馳四方生能無欲歿能不壞惟  
長春師爲然師救物以仁度人以慈澹然無極而眾美從之故  
遊其門者率聰明特達之士然傳法嗣教止於尹清和李真常  
二公而已清和公早慕真風徧趨法席濰陽化度沙漠侍行爲  
長春門弟子之冠其踵師掌教謙抑不居竟脫煩勞優遊以壽  
終若夫以清靜養真以仁恕接物華實相副文質兼全名重望  
崇使遠近道俗趨拜堂下惟恐其後則吾真常公有之矣公諱  
志常字浩然其先洺州永年人宋季避地濮之范陽尋又徙開

道藏輯要

甘水仙源錄

辛

翼集二  
八八八

之觀城因著籍焉高祖皓曾祖昌祖明父蔓皆隱德不耀素爲  
鄉里所重明昌癸丑春正月十有九日母聶氏夜夢異服一人  
授以玉兒覺而生公二歲喪父六歲喪母養於伯父濟川家濟  
川諱蒙名舉子也賦義兩科屢占上游雖以四舉終場同進士  
出身歉如也見公穎悟不羣嶄然出頭角意欲作成以償平昔  
之願而公不喜文飾雅好恬澹嘗默禱高穹望早逢異師勝友  
式副夙心年十有九伯將議婚公聞之嘆曰本期學道未涉津  
涯若愛欲纏縛則古人高蹈出塵之事業難乎有成矣同舍兄  
張本敏之初以嗣續規公旣知牢不可奪乃各言所志而訣居  
無幾負書曳杖作雲水之遊初隱東萊之牢山復徙天柱山之



仙人宮宮之主者曰湯陰李仙見公儀觀魁偉音吐不凡大加賞異逮公辭告之曰君玄門大器也山庵荒僻非久淹之地昔祖師所至異人並出今獨長春在焉宜往從之他時成就未可量也公翌日遂行至卽墨之東山屬貞祐喪亂土寇蜂起山有窟室可容數百人寇至則避其中眾以公後拒而不納俄爲寇所獲問窟所在捶楚慘毒絕而復蘇竟不以告寇退窟人者出環泣而謝之曰吾儕小人數百口之命懸於公一言而公能忘不納之怨以死救之其過常情遠甚爭爲給養至於康調迄今父老猶能道之歲戊寅夏六月聞長春師自登居萊公促裝往拜席下師一見器許待之異常山東路轉運使田琢器之高其道藏輯要

白水仙源錄

五

翼集下  
八文名

行且聞昔在卽墨主帥黃摑副統咨公籌畫保完一城以書邀至益都待以賓禮己卯冬十有二月我朝遣便宜劉相仲祿齎詔備禮起長春師於東萊時益都副帥張林白金歸宋叛服靡常公懼其爲阻滯乃往說林俾移檄所經衛送以行庚辰春二月師始命駕從行者十有八人公其一也二月達燕明年春二月北上秋七月至阿不罕山距漢地幾萬里並山漢人千家逆師羅拜以爲希世之遇咸請立觀擇人主之師將行指公坐上語眾曰此子通明中正學問該洽今爲汝等留此其善待之因賜公真常子號額名其觀曰棲霞師旣西邁公率眾興作刻日落成又立長春玉華二會至今不輟癸未夏五月師至自行在

憩於其觀一日齋客四集師手持一弓弦不言以授公公亦不言而受圈而佩之仍作詩爲謝師但笑領而已蓋阿不罕之留弓弦之授識者知其有付屬之意秋七月從師還至下水時殘暑尙熾師因納涼官舍之門樓字呼公而教之曰真師不易遇得道者不易逢逢之而不易識也守道之篤人貌而天行直寓六骸而淵宗忘飢渴而常甯至靜而遺形獨遊乎無極之妙庭此語汝當記之以俟他日自得之耳公拜而謝自承教之後益自奮勵息機體真敬事循理歷死生憂患之際曾不易其所守師住燕京之日凡教門公事必與聞之丁亥秋七月師旣仙去清和嗣教以公爲都道錄兼領長春宮事己丑秋七月見上於

道藏輯要

甘水仙源錄

卷

翼集二十一  
X九七

乾樓輦時方詔通經之士教太子公進易詩書道德孝經且具陳大義上嘉之冬十一月得旨方還庚寅冬有誣告處順堂繪事有不應者清和卽日被執眾皆駭散公獨請代之曰清和宗師也職在傳道教門一切我悉主之罪則在我他人無及焉使者高其節特免桎械鎖之入獄夜半鎖忽自開公以語獄吏吏復鎖之而復自開平旦吏以白有司適以來使會食所食肉骨上隱然見師像其訟遂息癸巳夏六月承詔卽燕京教蒙古貴官之子十有八人公薦寂照大師馮志亨佐其事日就月將而才藝有可稱者乙未秋七月奉詔築道院於和林委公選高道乘傳以來雖清和掌教而朝覲往來必以公故公爲朝廷所知

而數數得旨璽書所稱曰仙孔八合識八合識譯語師也戊戌春正月清和會四方耆舊手自爲書付公俾嗣教公度不能辭乃受之三月大行臺斷事官忽土虎奉朝命復加玄門正派嗣法演教真常真人號夏四月赴闕以教門事條奏首及終南山靈虛觀係重陽祖師鍊真開化之地得旨賜重陽宮號命大爲營建甲辰春正月朝命令公於長春宮作普天大醮三千六百分位及選行業精嚴之士普賜戒錄逮戊申春二月旣望醮始告成凡七晝夜祥應不可殫紀歲辛亥先帝卽位之始年也欲遵祀典遍祭嶽瀆冬十月遣中使詔公至闕下上端拱御榻親緘信香冥心注想默禱於祀所者久之金盒錦旛皆手授公選

道藏輯要

甘水仙源錄

卷

翼集十一  
又文子

近侍哈力丹爲輔行仍賜內府白金五千兩以充其費陛辭之日錫公金符及倚付璽書令掌教如故公至祭所設金籙醮三晝夜承制賜登壇道眾紫衣暨所屬官吏預醮者賞賚有差詢問窮乏量加賑卹自恆而岱岱而衡衡隸宋境公嘗奏可於天壇望祀焉旣又合祭四瀆於濟源終之至於嵩至於華皆如恆岱之禮祀所多有徵應鴻儒鉅筆碑以紀之壬子春正月命駕終南祖庭恭行祀禮規度營造凡山下道院皆爲一例以是地係教門根本故也逮四月旣望東歸癸丑春正月奉上命作金籙大齋給散隨路道士女冠普度戒牒以公爲印押大宗師甲寅春上又遣使作普天大醮分位日期如戊申而益以附薦海

內亡魂勅公爲大濟度師出黃金五百兩白金五千兩凡龍璧環紐鎮信之物及沉檀龍麝諸香並從官給自發牒至滿散鸞鶴五雲現於空際者無虛日公復念燕境罪徒久幽狴犴不以湔洗則無由自新言之有司蒙開釋者甚眾冬十有二月有旨召公乙卯秋七月見上於行宮適西域進方物時太子諸王就宴勅公預焉舍館旣定數召見咨以治國保民之術十有二月朔旦上謂公曰朕欲天下百姓安生樂業然與我同此心者未見其人何如公奏曰自古聖君有愛民之心則才德之士必應誠而至因歷舉勳賢並用可成國泰民安之効上嘉納之命書諸冊自午未間入承顧問及燈乃退丙辰春正月以老辭夏四

道藏輯要

甘水仙源錄

壽

翼集卷二  
×××

月至自北庭五月至晦總真閣之北簷無故摧壞六月庚申朔公倦於接應謝絕賓客隱几不言戊寅正襟危坐語左右曰昨夜境界異常吾自知卦數已盡歸其時矣主管教門向已奏聞令誡明張志敬受代餘無可議者翌日悉以符印法衣付之乃留頌順正而化春秋六十有四平昔著述多爲人所持去又有玄集二十卷西遊記二卷行於世公以儒家者流決意學道事師謹與人忠茹葷飲酒之戒涓毫不犯主宮門二十年凡所營繕皆公指授翬飛節比雄冠一時四方信施歲入良多悉付之常住一無私積羽化之日衣衾杖屨而已性質直不能曲意順情故謗訟屢興隨卽自解公一不校復以誠信待之方其與同

舍張君敏之之訣也各言其志敏之卒中司賦高第而公竟掌  
道教長春別幾二紀敏之以使北見留隱無背冠公兄事如昔  
并其屬給養之時河南新附士大夫之流富以私者往往竄名  
道籍公委曲招延飯於齋堂日數十人或者曰其煩公不恤也  
其待士之誠類如此長春道侶不下數百獨能誦誦明於齟齬  
教育成就卒付重任其知人之明又如此故能歷事三朝荐承  
恩顧雲輶所至傾動南北香火送迎絡繹不絕及聞訃音近者  
素服長號若喪考妣遠者出迓仙靈爲位以哭可謂其生也榮  
其死也哀矣庚申夏四月今上嗣登寶位中統辛酉秋八月詔  
贈真常上德宣教真人號明年夏五月既望子方逃暑不出誠

道藏輯要

甘水仙源錄

卷五

真集二

明子携諸執事踵門來見曰先師嗣法有功玄教今厭世幾七  
年不有以追述其美則門弟子輩俯仰慚怍殆無了期惟先生  
與師隣鄉縣熟其爲人敢以斯文請子辭之力不踰月凡三見  
臨具狀其師之道行及持虛舟道人李鼎之和所爲傳併以見  
示予觀其行實平美略無纖芥譎怪之事乃以予平昔之所見  
聞併爲次第其先後而銘之銘曰

道之爲教基於老氏不肆不耀知足知止性而身之全真則是  
質而文之真常乃爾粵惟真常系出仙李重陽裔孫長春嫡子  
笑授弓茲傳法微旨留建棲霞嗣教伊始言必成章動必循理  
誠以待士廉以律己萬口推尊三朝付倚善始令終榮生哀死

蒼蒼五華涓涓一水窈兮窈窕閱我冠履付畀得人追書遺美  
有狀斯述有傳斯紀仙靈雖昇仙聞不已我銘以辭無愧焉耳  
終南山重陽萬壽宮洞真子真人道行碑

宣授河南路轉運使兼廉訪楊奐撰

盈尺之璧徑寸之珠天下皆知其爲寶也不以蘊於山淵而不  
聞况於人乎東魯宣父炳辟世辟地之訓歷代史臣列隱逸逸  
民之傳宜乎綿亘千數百載而不廢也僕儒家者流竊有志於  
史學謹按洞真之行實斯亦古之所謂宗師者歟故碑之無疑  
師諱善慶字伯祥甯海人高門子公之後祖彥升主好時縣簿  
考道濟韜光不仕師幼不茹葷長通經史大義雅嗜道德性命

道藏輯要

甘水仙源錄

姜

真集二

之學與馬丹陽同里開大定二十二年丹陽演法於金蓮道場  
耄稚雲集而師預焉時甫十七矣丹陽見而異之且嘆曰向畏  
重陽譴訶頗萌倦弛然得以終其業者彥升力也使是兒入道  
殆天報乎其家聽執几杖以從再年冬丹陽返真徑造隴州龍  
門山謁邱長春長春俾參長真於洛陽得鍊心法丐食同華間  
明昌初長春歸海上囑曰汝緣在汧隴無他往夫人需友以成  
不可不擇復入秦卜吳嶽東南峯鑿石以處日止一餐凡可以  
資於道者造次不暫舍絕跡人間七八年迄今日其龕曰于真  
人洞友蒲察道淵待之如師後創觀汧陽之石門承安中好事  
者請玉清額禮體玄大師尋佩受法錄以誦道救物遠近益加

崇敬泰和三年隴之州將保賜沖虛大師號五年再謁長春啓  
證心印退隱相州天平山六年長春介畢知常緘示密語督還  
汧隴仍易名志道師再三敬諾參長生久之道價隆重輝照一  
時雖黃髮故老自以爲不逮也常謂學仙者存乎積累赴人之  
急當如己之急八年南征凱還憫其俘纍必盡力購援而後已  
元光二年隴山亂中太一宮李冲虛聞之舉以自代不起正大  
改元上悼西軍戰歿遣禮部尙書趙公秉文祭於平涼充濟度  
師秉文高其節圖像薦諸朝召之又不起二年饑荒或言路直  
秦岐之咽過客無別歲計奈何師曰吾門一見其難而遽如許  
不廣其矣言者悚愧未幾秋大熟遷五姓洞真觀環居弗出逼

道藏輯要

甘水仙源錄

卷七

翼集二  
又文八

中使絡繹不絕起而應之遂領中太一宮事七年河南不雨召  
近侍護師降香濟源上初期望祀於宮中而臨河阻風鐵劄旣  
沉斥鼓掉前進登岸風如故立致甘澍特旨褒異兼提點五嶽  
佑神觀天興二年春京城送款於我朝驛訪高道以師爲之冠  
秋七月約由中灤渡北邁時苦於餓依附者眾船人疑其有金  
帛迺避沿流而下夜將半遇一沙渚委之而去黎明驚濤四涌  
莫不倉皇失措會八柳樹堤潰乃定徐謂弟子符道清曰今日  
之事非爾不能濟道清秦人不安於水承命捷若神助俄賂二  
舟馳逐舉脫其厄其臨事如此過魏過魯過趙諸侯郊迎以相  
躡擁篲以相先玄通子范圓曦方爲人所尊信主東平上清宮

聞風虛席引避良有以也乙未秋入燕致祠處順堂下適清和  
嗣教門事待之如伯仲丙申燕境大旱而蝗俯仰輿情投符瀘  
溝乃雨蝗不爲災戊戌夏四月詔天下選試道釋進號通玄廣  
德洞真真人秋七月掌教李公真常奏請住持終南山重陽萬  
壽宮適北京留守烏公築全真觀奉之庚子太傅移刺寶儉總  
管田雄交疏邀師會葬祖庭卽日命駕入關總宮事綦白雲李  
無欲實綱維之而曹冲和志陽實潤色之丙午夏五月西遊鞏  
昌以汪侯德臣敦請故也冬盤桓秦亭賓僚劉澤瑛王道甯焦  
澍朝夕左右動靜語默具西州錄丁未春二月還宮張道士來  
雲中躬拜庭下師堅讓不受執事者曰真人壽垂九秩簪冠滿

道藏輯要

甘水仙源錄

美

翼集二  
X 5 X 8

前以此而處淵源之地過矣師曰禮無不答大白若辱廣德若  
不足老氏有之以丹陽接一童子必答焉忍自尊大耶庚戌冬  
十月二日沐浴正襟危坐猶平日翌日留頌以寓生不必樂死  
不必憂之旨曲肱歛息坦然順化春秋八十五後九日葬於宮  
之西北隅有洪鐘集行於世鎮陽馮侍郎壁傳其事甚悉在汴  
則尚書左丞張公行信平章政事侯公摯司諫許公古禮部尙  
書楊公雲翼王府司馬李守節修撰雷淵應奉翰林文字宋九  
嘉在燕則陳漕長時可吳大卿張侍讀本在關中則參省王輔  
臣郎中邳邦用講議來獻臣同德寺丞楊天德員外郎張徽中  
書掾裴憲經籍官孟攀鱗署丞張琚蓋當世景慕者也容力取



而言詰之哉師間氣天挺謙慈夷粹似簡而不失於倨似和而不涉於流信乎其難名也四方學徒不可勝數雖久於其事者未嘗見喜怒哀之色形於顏間察其日用之常則寒暑風雨無少變六十八年脇不沾席衣不解帶可謂慎終如始矣與人言惟正心誠意而已至於嗇神頤真之秘苟非其人閉口不吐恐失之強聒也精潔儉素不習而能一履韞之細至經歲不易肯以絲毫利諸己耶東徹海岱南窮襄鄧西極洮鞏北際燕遼瑰蹤瑋跡章章可考葬之明年春僕以南漕長告老燕臺無欲子促其徒往返六千里懇徵文石嗚呼玄鶴不來青山已塵遐想巖扉強勒之銘銘曰

道藏輯要

甘水仙源錄

堯

翼集二  
×二七

惟道與天初同原方術分裂無乃繁至人躍然起海門丹陽嫡子重陽孫空山大澤環四垣隱几坐觀萬馬奔物生不願爲犧樽火烈始見玉性溫西鞠東翔動帝闈歲旱懷詔濟濱源洪流怒濤鯨吐吞靈符一擲懾老坤蜚廉馮夷掖兩轅焦穀載沃如平反朝那夜哭戰死魂霓旌豹尾交續緡揚枝塵灑消沉寃隨機應物忘清渾疾雷破曠電燭昏功成弗居德愈尊上賓碧落何軒軒道路掩面泣宿恩洪鐘叩擊皆玄言包括鄭圃羅漆園陸陶殊派契義敦我舌入筆勢可捫赤書翠琰馨蘭蓀